

摘藻堂四庫全書薈要

集部

欽定四庫全書薈要卷一萬四千三百七十三

集部

文忠集卷八十八

宋 歐陽修 撰

內制集第七

賜河陽三城節度使同中書門下平章事判河南
府文彥博加恩告勅詔

朕因孟冬之吉辰饗太宮而合食膺受神貺推行慶恩
眷惟同德之臣方處居留之任宜優異數少示眷懷既
敷告於外庭其往祇於休命

內中福寧殿開啟祫享預告道場青詞

十月十九日

伏以宗廟之嚴祫祭為重乃卜孟冬之吉躬修合食之儀仰企上靈冥孚陰佑俾克成於盛禮冀永錫於純禧式展孝思用膺神貺

在外五嶽四瀆四海并諸神廟等處謝祫享禮畢

祝文

十月十九日

屬者卜吉孟冬致饗清廟聖靈來格福祉沓臻荷神貺之不違俾縟儀之克舉敢忘神報達此明誠

泗州塔下并峨嵋山開啟謝禘享禮畢道場齋文
茲者冬物告成因饗親而達孝神釐來貺既均慶之以
時惟盛一作禮之弗違荷巨慈之旁佑即靈場而申報
冀冥鑒之孔昭薦此誠明期於福應

太平興國寺開先殿開啟孝明皇后忌辰道場齋
文十一月一日

伏以柔明之範瞻厚德而已遐感慕之思託洪慈而申
薦載嚴寶殿恭啟貝函惟淨福之是資冀靈游之永祐

太平興國寺開先殿開啟孝明皇后忌辰道場功
德疏右語

右伏以真覺之慈應物溥示於能仁孝思之感以時式
臨於諱日俾延淨侶交奏梵功冀承勝利之因永獲冥
深之祐

賜西南蕃蠻人張光現等勅書

十一月三日

汝世守邊疆遠輸忠順時修職貢附達款誠載嘉勤恪
之心宜示褒優之錫

賜宰臣富弼乞退不允批答

省具表之夫知人之明可謂難矣而任賢之術茲豈易哉若乃聽之不聰信之不篤施設之方未盡弗極其材遲速之効有時莫能少待則被其任者實亦艱歟卿以純一忠亮之誠蘊宏深遠大之業朕虛已以聽推心仰成至於一二之臣是惟同德下逮衆多之論曾靡間然方將甄叙賢愚修明法度務究本根而更治不求歲月之近功期於有成茲乃予意奈何中道而將止夫亦奚

託以為辭矧上下既交寧有不通之志而君臣相遇豈為易得之時當體余懷勉安厥位所乞宜不允

賜外任臣寮進奉助祫享銀絹等勅書

朕卜吉孟冬合食清廟禮樂交舉臣工畢從嘉守土之修官咸以時而來助各以其物粢然在庭載省勤誠良深歎尚

賜觀文殿學士禮部尚書王舉正乞致仕不允詔

十一月十四日

夫朝廷之廣大賢雋之衆多必有皤然耆壽之臣以當
上所優禮之異或事思所訪則有老成俾時之式瞻以
為人望故禮雖七十猶有不得謝者焉卿懿文高行有
君子之風清節令問為當世所重閱書祕殿日侍清閒
進讀經筵坐論道德固非有官司之責筋力之勞宜思
少安副我眷待

鎮潼軍華陰縣雲臺觀修整真宗皇帝御容等殿
今已了當扶請御容入本殿奉安祝文

十一月
十四日

屹爾名山斯為福地翼然寶構式奉威靈繕完既新考
卜惟吉鑒茲懇至永以妥安

鎮潼軍華陰縣雲臺觀修整聖祖及真宗御容等

殿今已了當乞請御容入本殿奉安青詞

十一月十四日

伏以靈峰甚峻仙宇載嚴爰考古辰奉寧真聖式伸祇
告昭鑒乃誠

賜相州觀察使劉從廣進奉乾元節馬詔

御藟有敏材膺于寄任遠瞻壽節効乃誠勤在庭之獻

肅陳事上之忠可見省閱之際嘉歎不忘

賜觀文殿大學士尚書戶部侍郎知定州龐籍乞
退不允詔

勅龐籍省所劄子奏以年齒衰殘自去年七月後累奉
表及劄子輸漑懇誠尋蒙差知定州亦曾面告祇乞一
年許賜請老歸第伏望早賜差人承替得遂前懇事具
悉夫難進易退雖士節之甚美而尚賢優老亦朝家之
所先故禮稱引年而有不得謝卿以偽德為時舊臣東

於予秉任以方面材猷甚壯視聽方彊矧夫邊候無虞
民事尤簡固可以偃息藩屏養頤精神而遠慕昔賢願
還官政雖止足之意誠可尚於高懷而眷遇之深難遽
從於來請所乞宜不允故茲詔示想宜知悉冬寒卿比
平安好遣書指不多及

賜河陽三城節度使同中書門下平章事判河南

府文彥博辭加恩不允詔

十一月十七日

勅彥博省所上表陳讓祿享禮畢加恩事具悉朕屬者

潔齋精誠薦見宗廟蒙神之貺受福孔多推慶賜以大
行均中外而咸及矧我同德乃時舊臣惟體貌之隆宜
加於異數而褒優之意未稱於予衷嘉讓節之甚勤顧
成命之難止所讓宜不允故茲詔示想宜知悉冬寒卿
比平安好遣書指不多及

賜樞密使檢校太尉同中書門下平章事宋庠讓
恩命第二表不允斷來章批答口宣

卿陪祀疇勞啟封加命再形懇讓深識沖懷顧定志之

弗移宜承命而毋忽

西太一宮開啟祝聖壽年交金籙道場青詞

十一月十二

十三

日

伏以萬物堅成樂歲功之斯就四時迭運荷乾施之無窮爰即靈場載啟科式薦以芬芳之潔通於杳默之神伏願威鑒昭臨福禧穰集固穹隆之壽厯延綿永之皇圖下逮羣生咸均餘祐

萬壽觀寧華殿開啟溫成皇后忌辰道場青詞

十一月十二

月二十
九日

伏以妙道無方推乎善應清真昭格通以明誠追內則
之有儀藹餘芳而未遠式臨諱日俾按醮科爰即琳宮
肅延羽士冀資冥福永助仙遊

閤門賜許懷德張茂實告敕口宣

卿素稱忠勇備著勞能俾更旄節之榮仍董貔貅之旅
往膺寵命其體眷懷

賜觀文殿學士禮部尚書王舉正乞致仕不允詔

十一月二十九日

卿精深之學足以待問清懿之望足以鎮浮嚮從守藩
念遠賢之在外來侍經席冀開予於未聞惟道德之所
資非舊耆而誰處雖引年之制禮固有常而愛老之心
予寧敢怠所宜勉近醫藥輔安精神期臻壽康以副虛
佇所乞宜不允

賜馬步軍副都指揮使張茂實赴闕生料口宣二十

月六日

卿遠趨召節方屆都城惟茲餼品之豐式舉彛章之舊
往祇寵錫式體眷懷

班荆館賜契丹賀正旦人使到闕御筵口宣

十二月十九

日

卿等歲元茲始隣好時修載馳使傳之勞方次都門之
近宜伸頒錫式示眷懷

正月五日賜賀正旦人使內中酒果口宣

卿等夙將信聘來結隣歡方伸宴飫

一作飲

之豐式示眷

懷之意芳醪嘉實宜厚寵頒

賜侍衛親軍馬軍副都指揮使張茂實讓恩命不

允詔

十二月十五日

卿蔚有材武稱於周行早罄忠力膺予寄任自分齊鉞
屢易名邦俾更節制之權入總禁嚴之旅扞城宿衛皆
汝職焉載閱來章雖嘉讓節趨祗成命宜體眷懷所讓
宜不允

內中福寧殿開啟天慶節道場青詞

伏以新陽叶律肇正於歲端嘉節紀時蓋遵於國典載
嚴祕殿遐企上真薦茲蠲潔之誠杳達清冥之應冀承
靈貺永祐皇圖

內中福寧殿罷散天慶節道場青詞

伏以元符肇貺先聖是膺紀為令節之名著乃仙科之
式用嚴禁密恭薦必芬冀真馭之昭臨貺嘉祥而茂集
基圖永固動植均休

賜新除建雄軍節度使依舊殿前都指揮使許懷

德讓恩命第二表不允斷來章批答

十二月五日

省表具之卿拔從行伍之微董我師徒之衆嘉爾勞舊
優之寵榮乃思功效之未彰能形避讓之冲懇已行之
命其往欽承事上之忠無或怠忽所讓宜不允仍斷來
章

內中御侍已下賀皇帝年節詞語

妾等言伏以堯官謹歷萬物惟新夏數得天四時以正
恭惟尊號皇帝陛下睿明稟哲慈儉保邦正朔頒行極

舟車之所至仁恩

一作慈

溥及順天地以發生妾等忝備

掖庭獲瞻黼座順三微之首月祝萬壽於無疆

賜夏國主進奉賀正旦馬駝詔

王正首歲玉歷頒春眷惟繼世之忠克効守藩之職勤修時貢來旅明庭言念傾輸良深歎獎

皇帝回契丹皇帝賀正旦書

正月日伯大宋皇帝致書于姪大契丹聖文神武睿孝皇帝闕下歲端更始順陽律以布和信聘時修講隣歡

而增固閱書言之勤好加筐幣之腆豐感戢所深述宣
罔既今懷化軍節度使耶律淑等回專奉書陳謝不宣
白

皇帝回契丹皇帝達皇太后賀正旦書

正月日伯大宋皇帝致書于姪大契丹聖文神武睿孝
皇帝闕下玉厯頒時寶隣交聘兼馳使駟別枉信函載
傳慈懿之言益固講修之好願希侍次達此悰誠今歸
德軍節度使耶律思寧等回專奉書陳謝不宣白

賜起居舍人知制誥劉敞等獎諭詔

十二月九日

勅劉敞省所進祫享詩事具悉祫大祭也禮久闕焉朕
因時孟冬躬薦圭鬯永惟祖考之烈格于天地禮樂之
盛昭乎一作于物容宜有儒學之臣形為頌歎之美卿議
論宏博辭章爛然敷訓告以代予言是惟其職發掄揚
而稱上德聊見餘才省闕已還嘉尚良切故茲獎諭想
宜知悉

賜刑部郎中充天章閣待制錢象先等獎諭詔

十二

日 月九

勅象先省所進祫享詩事具悉祫大祭也禮久闕焉朕
因時孟冬躬薦圭鬯永惟祖考之烈格于天地禮樂之
盛昭乎一作于物容宜有儒學之臣形為頌歎之美覽奏
篇之來上慶熙事之有成文采可觀歎嘉于再故茲獎
諭想宜知悉

賜屯田員外郎國子監直講梅堯臣獎諭勅書二十

日 月九

勅梅堯臣省所進祫享詩事具悉汝行懿而粹學優而純以詩自名為衆所服況乃詠祖宗之功德述禮樂之聲容宜被朱絃以薦清廟載披來獻深用歎嘉故茲獎諭想宜知悉

賜西京作坊使知麟州王慶民獎諭書

十二月十七日

勅王慶民省所奏準密院劄子節文以臣撰成麟府二州絹圖一面并序目二冊詣闕上進事具悉古之用兵者必因地形制方略然後可以策勝敗之筭運奇正之

謀爾以材武之資有明敏之識自膺東寄出守邊封而
能周知山川險易之形厯覽亭障屯防之要列為凡目
祭爾一作可條陳不惟指掌於披圖足以因時而制變遽
茲來上深體乃忠省閱以還歎嘉曷已故茲獎諭想宜
知悉

集英殿告遷宣祖皇帝昭憲皇后御容赴奉先禪
院慶基殿奉安祝文

伏以祖烈昭宣威神緬邈顧祠庭之夙敞崇寶構以載

新冀即妥安永伸

一作申

嚴奉

奉先禪院法堂上告遷宣祖皇帝昭憲皇后御容
赴內中奉安祝文

伏以早嚴寶殿以佇神游今奉威靈即安清禁仰惟鑒
格歆此精衷

景靈宮奉真殿開啟真宗皇帝忌辰道場看佛經
都功德疏語

伏以威神在天奉真遊而時格覺慈宣化敷慧福以無

窮追諱日之甫臨演祕言而申薦永繫仁佑式慰孝衷
景靈宮奉真殿真宗皇帝忌辰道場看道經都功

德疏語

伏以琳宮嚴敞奉真馭以來臨寶笈飛華演靈篇而甚
祕式屆遏音之日載深濡露之懷遐薦福因永資道蔭
景靈宮廣孝殿章懿皇后忌辰道場看佛經都功
德疏語

伏以諱日斯臨孝心增感永慕至慈之德載瞻大覺之

雄既集善因遐資福果

景靈宮廣孝殿章懿皇后忌辰道場看道經都功
德疏語

伏以春露既濡孝思罔極即仙庭之祕邃誦金簡之精
微仰冀清真永資遐福

賜新除建雄軍節度使殿前都指揮使許懷德讓
恩命第一表不允批答口宣

卿以宿衛之勤勞能備著俾移使節式示眷懷宜體優

恩勿持堅讓

賜新除建雄軍節度使殿前都指揮使許懷德讓
恩命第二表不允斷來章批答口宣

卿夙推才武久擁節旄俾易名藩用伸優遇無煩固避
往服新恩

賜觀文殿學士尚書右丞田況乞致仕不允批答

嘉祐五年
正月八日

省表具之卿德量足以容衆材識足以濟時蔚然君子

之風綽有大臣之體自嬰疾恙求解樞機朕心惻然深
以為惜乃惟書殿之清職自非耆哲而弗居俾從優游
以便頤養所期福善之理當蒙勿藥之休還來輔予以
盡賢業遽形引謝良異眷懷所乞宜不允

皇第九女封福安公主制

正月二十四日

門下朕稽有國之彝章著皇女之稱謂取其主以同姓
所以見王體之尊必也錫之美名所以彰禮命之寵載
涓吉日敷告在庭皇第九女岐嶷之姿有生知之異稟

柔順之質得天性之自然方嚴保傳之規以養肅雍之德俾遵舊典褒以徽章嘉乃妙齡盛哉儀服考僉言而惟允非予意之敢私於戲隆仁恩以厚親茲惟教愛習圖史而循法繫乃夙成祇若訓言往膺渙渥一作命可封福安公主仍令所司擇日備禮冊命主者施行

皇第十女封慶壽公主制

同日

門下詩紀王姬之盛車服之制甚嚴漢優帝女之儀湯沐之封並列蓋敦國體匪曰親私惟始被於寵章常推

澤於嘉號載稽成憲誕告外庭皇第十女寶婺分暉仙
源襲慶天姿異稟溫而有儀姆教不煩生而知善方居
妙歲對有令猷朕仰承燕翼之謀茲膺一作膺茲蕃衍之祉
俾新禮命式示褒榮於戲寵秩既崇在乎有德名稱甚
美享乃多休祇服茂恩勿忘明訓可封慶壽公主仍令
所司擇日備禮冊命主者施行


內中御侍已下賀皇帝乾元節詞語

正月二十六日

妾等言正陽旅月式符誕聖之期令節稱觴共獻無疆

之壽伏惟尊號皇帝陛下法堯聰睿躬禹儉勤厚德浸
於黎元至仁同於覆載舟車所及聲教咸均罄茲率土
之濱共効南山之祝妾等欣逢嘉會獲侍嚴宸敢望清
光恭陳善頌無任歌時樂聖歡呼激切之至

文忠集卷八十八



總校官庶吉士臣張能照

校對官中書臣孫希旦

謄錄監主臣張起隆

欽定四庫全書叢要

集部

文忠集卷八十九至
九十一

詳校官助教臣常循



欽定四庫全書薈要卷一萬四千三百七十四

集部

文忠集卷八十九

宋 歐陽修 撰

內制集第八

乾元節謝內中露香表

嘉祐五年正月二十六日

伏以清穹眷佑皇緒丕隆方陽月之正時屬誕辰而著

節仰瞻霄極薦此芬馨冀膺敷錫之祥永保延鴻之慶

乾元節謝內中真宗皇帝表

同日

伏以佳名著節載誕紀辰永惟涼眇之躬獲荷顯休之

業動遵聖訓期保慶基怵惕之懷孝思罔極

乾元節謝內中章獻明肅皇太后章懿皇太后章

惠皇太后表

同日

伏以天陽正候壽節紀時深惟載育之恩緬慕至慈之德敢忘翼勵期保延鴻

賜樞密副使右諫議大夫張昇乞解罷第一表不

允批答

正月二十九日

省表具之朕惟一二左右之臣出納樞機之命必有同

德為時老成卿質厚器宏材優識敏風力甚勁晚而不
衰議論有稽言而必中朕所體貌民之具瞻豈宜退狗
謙沖自厭繁務盡瘁事國矧惟素懷推心仰成當體予
意所乞宜不允

除文彥博易鎮判大名府制

二月十五日

門下朕惟將相之崇資是為文武之極選隆其名器所
以重朝廷列于蕃宣所以屏王室矧乃居留之任必屬
老成之人爰擇剛辰敷告有位具官文彥博器閎而厚

識粹而明學得其方通古今而知要才周於物適大小
以惟宜自奮發於聲猷早更揚於中外居則叅裨乎國
論出則宣暢乎皇威兩踐台司首當柄用賢愚式序舉
百職以咸修綱紀甚明贊萬機而至悉自

一無此字

懇避鈞

衡之任出司管鑰之嚴逮此逾時蔚然休問眷言邦哲
實簡予衷是用更其擁節之榮委以別京之重勁兵所
宿實資總制之權雅俗惟淳兼賴撫綏之政於戲與國
同體是謂股肱之良惟民具瞻方隆師尹之望顧我舊

德豈煩訓辭往其欽哉祇服休命可特授依前檢校太師同中書門下平章事潞國公行陝州大都督府長史充保平軍節度使判大名府兼北京留守司事充大名府路安撫使加食邑七百戶食實封五百戶功臣散官勳封如故仍放謝辭發赴本任主者施行

除李昭亮檢校太保判定州制

二月十五日

門下嚴師律以宣威是為將率之事謀王體而坐論必屬廊廟之臣惟二柄之是兼蓋一時之首選顧於寄任

宜副倚毗爰告外庭式揚休命具官李昭亮資質純厚
器識通明世有勲庸對為舊德家傳韜畧濟以美材爰
自壯齡早膺獎擢訓齊士伍號令信於恩威宿衛朝廷
勤勞著於夙夜屢被蕃宣之寄實資鎮撫之才惟留鑰
之別都乃宿兵之重地歲時滋久譽望益嘉眷言中山
還爾舊治是用易以將旄之寵增其帝傳之崇於戲宣
國威靈用綏寧於邊鄙求民疾苦以班布於教條俾無
比顧之憂惟我老成之倚往踐厥位時惟欽哉可特授

檢校太傅依前同中書門下平章事行兗州大都督府
長史充泰寧軍節度使充定州路都部署兼安撫使判
定州加食邑七百戶食實封三百戶功臣散官勲封如
故仍放謝辭發赴本任主者施行

除李端懿寧遠軍節度使知澶州制

同日

門下至治之時常不忘於武備用兵之要在先擇於將
臣禮樂詩書必資於學智信嚴勇又兼以仁是惟難才
豈不慎選用諷

一作
擇

剛日敷告外庭具官李端懿器質

宏深資識敏茂地聯近戚無富貴之驕世濟美材躬儒
素之行粵從壯歲綽有令名學問足以與謀忠信可以
事上而能克勵名節靡皇宴安每思報國以有為嘗請
治民而自効北州之政稱最東土之人甚思惟留務之
是居顧歷時而頗久俾加褒進爰考僉同是用寵以節
旄委之蕃翰於戲為政而先無擾所以靖民除戎以戒
不虞是宜有素繫乃通明之畧副予東任之懷往惟欽
哉膺此休渥可特授依前檢校刑部尚書充寧遠軍節

度使知澶州加食邑七百戶食實封三百戶散官勲封如故主者施行

賜禮部侍郎參知政事曾公亮乞罷不允詔

二月十八日

卿以敏識精學參贊萬務儔德茂行表儀百僚而思慮之勞偶嬰疾恙藥石之効聞比康平嘉謀話言日以虛佇封章屢上引避甚堅豈未體於眷懷而每煩於開諭宜專輔養以副倚毗所乞宜不允

賜新除寧遠軍節度使李端懿讓恩命第一表不

允斷來章批答口宣

同日

卿聯國懿戚惟時美材久居留使之權俾委將旄之任
載嘉沖挹思避寵榮宜體眷懷無煩牢讓

閣門賜新除寧遠軍節度使知澶州李端懿告勅

口宣

同日

卿世胄聯華資材甚茂早膺器使頗著聲猷俾進總於
中權式增榮於戚里所宜祗服以體眷懷

賜新除工部尚書知秦州張方平陳讓不允詔

三月

十六日

卿識茂器閎智優學博施於有用謂靡不宜乃眷西陲
最為重地惟撫綏備禦之任必通明敏給之才予難其
人於爾為得委遇之意則惟其勤避讓之誠夫何于再
勉祇其往當體朕懷

賜樞密副使尚書禮部侍郎程戡乞退休第二表

不允批答

三月十六日

省表具之朕惟朝廷之禮廣大材賢

一作賢材

之士衆多必

有耆哲之臣以為時望之重卿早被獎擢藹然聲猷參
聯鈞輔之崇協贊樞機之要履躬之懿久見於純誠事
上之忠志期於盡瘁顧方深於毗賴而懇避於寵榮封
章繼來敦諭亦至引年以禮雖嘉止足之賢優老虛懷
未忘眷遇之意往安厥位宜體予衷所乞宜不允

大相國寺大殿上開啟為民祈福道場齋文

五月三日

伏以南薰被物方茲長育之明西覺稱雄允賴慈仁之

濟俾延淨侶虔啟法筵冀迎百善之祥普洽萬生之衆

賜宰臣富弼第二表乞退不允批答

五月十五日

省表具之卿事君一心憂國百慮簡拔寒俊而多得遺才慎重賞刑而惟恐過舉蔚然德業方厚倚毗而綱憲之司異同輿論或事非大體或言涉難明因其据撫於至微益見始終之無過雖開廣言路務在兼容而進退大臣豈當緣此所宜篤卿自信之志成朕不惑之明渙然無疑來復厥位所乞宜不允

賜宰臣富弼乞退第四表不允斷來章手詔

省四上表乞解機務事具悉朕力排讒構之言兼採搢
紳之望委卿以重任待之以不疑惟致治之至難方同
心而共濟勉以無怠庶幾有成而執法之臣以言為職
議既不一理難必從遂其好勝之私因於積忿而發事
緣藹昧語涉中傷遽罷憲司以釋羣惑雖朕之不明不
敏既能為卿而辨之而卿亦何嫌何疑遂將去朕而不
顧避辭已確敦諭亦勤其體予懷復安爾位使天下曉

然知朕任賢而勿貳也所乞宜不允仍斷來章付富弼

賜樞密副使張昇生日詔

一作口宣
五月九日

卿以業履之清優任樞機之密勿余所禮遇時之具瞻
爰屆誕辰俾加慶賜

賜荊湖北路救濟飢民知州獎諭勅書

五月二十
七日

夫修人事所以禦天災安吾民豈不在良吏爾學優從
政職任治人因凶歲之疫飢體詔書之隱惻既免罹於
殍饉仍不夭於札瘥再惟敏事之材深得卹荒之禮第

課來上予心所嘉宜有褒章以旌善績

賜河陽三城節度使同中書門下平章事文彥博

進奉謝袷享加恩詔

六月十七日

詩云君子邦之基記曰夫臣民之表予所寵異禮宜優
隆乃因祭福之均恩首效駿良而來獻載惟誠恪深用
歎嘉

賜定國軍節度使知并州梁適進奉謝恩馬詔

六月

十七日

大鹵之雄中權為重時有舊老東于予衷寵之旌鉞之
榮委以蕃宣之寄效駿良而來獻將誠慤之甚勤省覽
已還歎嘉曷已

賜觀文殿大學士知定州龐籍進奉謝恩馬詔

六月

十七日

書殿之職號為清優舊德之臣所宜寵異乃求駿足以
副勤誠曾非貴物之心實體事君之節省閱于再歎嘉
不忘

賜虔州觀察使定州路副都部署劉渙進奉謝恩

馬詔

同日

國家慎選材武委之事權優其寵榮所以責効厚其頌予所以養廉乃因物以達誠見事上之惟恪省閱于再歎嘉不忘

賜定國軍節度使梁適進奉謝恩馬詔

卿惟時舊德為國將臣推恩典以既優俾家庭之增寵乃輸良貢以効誠勤省閱以還歎嘉彌切

賜外任臣寮進奉賀祫享禮畢勅書

六月十七日

朕以孟冬卜吉大祭仲虔惟熙事之既成實庶邦之共慶載披來貢深見翰忠省閱以還歎嘉良切

賜翰林學士尚書兵部員外郎知制誥吳奎乞知

青州不允詔

七月二十一日

卿強學博覽足以通古今嘉謀讜言足以承顧問朝夕獻納余有望焉矧方委之劇煩嬰以事任懋乃賢業宜有施於朝廷奮乎壯猷豈暇便於鄉里其安爾職深體

眷懷

卷八十九

賜新除宣徽南院使檢校太保鄜延路馬步軍都
部署經畧安撫使判延州程戡讓恩命第一表不
允斷來章批答

八月八日

省表具之迺者卿數上封章懇辭樞要兼引年而為請
思還政以自頤眷惟耆舊之英誠久劇繁之任俾增書
殿之職仍參講席之聯是曰清優豈忘顧遇而進見之
際聰明未衰迺遷使領之華往重邊陲之寄予意所屬

僉言允諧雖冲尚之可嘉惟成命之難止所讓宜不允
仍斷來章

賜建昌軍楊儀進奉銀珠稻米勅書

八月十六日

勸力農而務本惟汝之官登嘉穀以告豐乃時之瑞祭
然良實來効貢囊載惟修職之勤式緩憂民之意省閱
于再歎尚不忘

賜右諫議大夫知梓州呂居簡進奉乾元節無量

壽佛一燈勅書

同日

壽觴紀節罄率土以均歡妙像有儀獻無疆之善祝嘉
乃愛君之意見於事上之恭省閱以還歎嘉良切

賜新除翰林學士依前禮部郎中知制誥權知開

封府蔡襄上表乞依舊知泉州不允詔

八月十五日

卿學通古今足以備獻納政適寬猛足以臨劇煩而得
材之難顧常勞於選任矧居外茲久寧自逸於便安是
宜勉旃來服新命綽有餘力夫何微疾之辭居然寵名
固為榮養之樂其毋必讓當體至懷

賜屯田員外郎王公衮獎諭勅書

嚮者長人之官備盜不謹害我命吏驚茲遠民汝於斯
時能奮厥効督捕甚急饋餉有方致茲兇徒卒就擒戮
第功來上覆實不虛載嘉勤勞深用褒歎

東太一宮立冬祝文

九月二十四日

四時適序萬物堅藏嘉歲事之有成繫神休之是賴承
茲靈貺報以吉蠲惟冀享誠益敷多祐

延福宮性智殿開啟皇后生辰道場齋文

同日

伏以坤德流徽式臨於誕日貝文宣妙恭仰於巨慈載
嚴祕邃之庭駢集清修之侶冀資壽福時啟靈場伏願
毫相分光法雲假蔭憑茲勝利永保遐齡

延福宮性智殿開啟皇后生辰道場密詞

九月二十六日

伏以寒律正時適臨於良月曾沙誕慶爰紀於嘉辰夙
清祕殿之嚴並集祇園之侶冀因勝利延錫禧一作祥
永輔坤儀益隆壽祝

故贈濮王允讓十月九日圻橫祭文

同日

日月惟吉山川既佳啟茲櫬塗往即襄事顧歆薄奠宜
體哀悰

故贈濮王允讓十月十八日起靈祭文

同日

儀物既備川塗甚夷往即佳城卜茲吉日靈其顧享副
此哀懷

故贈濮王允讓十月二十日下事祭文

同日

惟靈稟德甚茂享年不遐余心所哀卹典斯備往即安
宅享茲克誠

撫問護葬使向傳式詔

同日

葬之為禮古所重焉方將事以在塗顧勞心於祇役眷
賴之意不忘于懷

撫問西京并汝州路祔葬隨護宗懿已下勅書

同日

日月惟吉川塗匪遐顧襄事之有期嘉送終之盡禮勞
勤備至眷矚良深

撫問尚宮沈氏勅書

同日

輒旌就道霜露戒時載惟將護之勞無怠祇勤之意

撫問西京并汝州路管勾修墳并沿路巡檢道路
及管勾一行靈輦程頓排辦等朝臣使臣內臣等
勅書

卜吉趨時送終備物顧風霜之方厲念事役之為勞
賜宰臣富弼上第一表乞解罷機務不允批答

省表具之夫宰相之事非可以歲月考而一二數也其
在朝廷選賢任能而各得其職下俾民俗遷善遠罪而
不知其然至於法度修紀綱正然後相與慎守而安行

之以臻于治此朕所以虛心一意日有望於卿者也今
事有緒而卿辭焉豈朕德之不明將顧時之不可中道
而止夫何謂哉俾予獲用材不盡之譏而卿涉苟安自
便之計予所不取卿其勉焉所乞宜不允

賜宰臣富弼上第三表乞解罷機務不允斷來章
批答

省表具之卿博通古今之學深達治亂之原德業之隆
名稱甚盛朕方虛已而任不愧知人之明而自秉鈞衡

宣勞夙夜惟是小大之政損益施設惟卿之為罰罪賞
功進退能否惟卿之聽時有異論豈無多言一切屏之
惟卿之信若乃恭己南面庶幾輔予享其成功登于至
治亦惟卿之圖其三者人君之所難予罔敢忽其一者
在卿之不止庶克有成而無名屢辭實所難諭卿其體
茲至意究乃素懷所乞宜不允仍斷來章

文忠集卷八十九

欽定四庫全書薈要卷一萬四千三百七十五

集部

文忠集卷九十

宋 歐陽修 撰

表奏書啟四六集第一

諫院謝賜章服表

同王素

慶歷三年九月

臣某等今月日準閣門告報奉聖旨來日改賜章服者
臣等尋以列狀具言供職以來未有能効不敢即受乞
賜停寢明日朝于垂拱退立簾下俟命不報方共彷徨
未知進退而閣門吏已迫臣等入對及見于延和有司

贊使俯伏受命臣等不勝惶恐趨出以辭伏蒙遣中使
宣諭云出自宸衷並不因臣僚薦舉不得辭讓臣等知
君命甚寵不可必讓因退而拜受俯伏之際竦動羣臣
伏惟陛下聖德仁慈優容臣下凡有上殿者多因事陳
述自乞章服故陛下不因臣等奏事之時特召賜見又
宣明命告以出自宸衷蓋不欲使臣等雷同倣倖之流
而為外人譏議乃知陛下愛惜臣等至於如此臣等愛
君憂國之勤自宜如何伏惟天地之恩無物可稱欲伸

報謝惟有至誠今陛下以一章服賜臣等尚不欲令外人所非伏況陛下上承社稷之重下制元元休戚之命舉動得失所繫者大則臣等固當事無大小一一規正致陛下纖過小失不見於外然後可以稱臣等報君之心如陛下所以愛惜臣等之意臣等無任

辭召試知制誥劄子

慶歷三年十二月

臣今早準中書傳指揮令臣到聚廳處尋問得有聖旨令臣就試伏念臣自忝諫垣言事無狀日月未久恩渥

已頻凡朝廷任用非人僥倖干進在於臣職皆所當言
豈有自為僥倖以冒榮寵其召試指揮伏乞特賜追寢
取進止

辭召試知制誥狀

同前

臣今日準中書召臣聞有聖語令臣就試已曾略具劄
子辭免退而循省未止憂驚伏念臣本乏才能豈堪任
用誤蒙聖獎擢在諫垣竊自思維無以論報但竭愚慮
知無不為凡姦邪在朝僥倖求進多以激訐沽名未察

臣心紛然議謂臣亦自省忠國之節特惟陛下知之而
可畏之言何由悉辨但誓不敢干進庶幾久乃自明今
若驟覓寵榮越次升用則是譏議者謂臣向之所為果
是沽激本非為國而去惡但務傾人而進身不惟使今
後朝廷擢用忠言之臣不以自明而取信兼恐小人見
言者得進既速則各務奔趨一長其風遂成媮弊蓋上
干於國體非止徇於臣私況臣供職未久言効無聞方
今百度未修四夷多事言者正當以失職坐黜豈可以

亡狀遽遷其召試之命必望特賜追寢緣臣早來為中書催召倉卒之際論述未詳謹再具狀奏聞

辭直除知制誥狀

同前

今月六日準中書召臣試尋曾具劄子并奏狀辭免今日忽聞已有聖旨更不召試直除知制誥者伏以聖恩優異至寵至榮臣所以敢茲懇請者盖以上繫朝廷任人之體非專臣子飾讓之私唯冀聖明察臣悃悞竊以朝廷進用臣下患忠邪不分欲辨忠邪須覈情偽今一

言事之臣得速進則小人好進紛然爭以口舌為事至其甚弊理難抑絕則後來有謹言之士必雷同以干進見疑使君子小人情偽何別故臣以謂任人之體惟言事者不可以速冒寵榮臣累得對便殿奏事之際常陳此說伏況臣供職已來日月未久幸值陛下切於求理優容直言然而夷狄未賓盜賊未息官吏未汰黎民未蘇以事考言其効安在而數月之內恩典頻仍當黜而升宜罰而賞繫於國體則如前所陳揣於臣私則自知

若此且夫設官賦祿本以勸善擢臣一人好進者得以
奔趨無勞者皆容忝冒所損已多伏望聖慈憫臣愚訥
直降恩命特賜寢停

辭免第二狀

同前

昨以準中書劄子為臣累辭恩命奉聖旨不得辭讓者
伏以臣之事君有誠無飾若理必當受則豈敢虛辭上
煩聖聽自陷矯詐盖臣所陳述者上繫朝廷事體非獨
專徇臣私如臣之愚本以言事者速進則偽言者誘以

爭趨今若辭讓而不獲則偽讓者終於得進損之又損
不如不辭臣猥以非材已在言責若陛下欲擢臣以責
効則今所居之職自足展効但患無能若以寵典為賞
勞又無可賞伏況此來恩命特出聖心臣子至榮人所
願得苟非深思熟慮理須避讓豈敢固自稽遲以干典
憲伏望聖慈察臣至誠至懇所除誥勅早賜追還

舉呂溱自代狀

同前

準先降勅節文應兩省臺官尚書六品已上諸司四品

已上授官訖具表讓一人自代於閣門投下方得入謝者

右臣伏見著作郎直集賢院知蘇州呂溱首登辭科素有文學不肯碌碌以希例進請補外郡躬勤政事今蘓州治狀為兩浙第一臣嘗與溱同在館閣聞其論議服其度量材美甚衆非臣所如擢以代臣庶允公議謹具狀奏舉以聞

謝知制誥表

同前

臣某言伏奉制命蒙恩特授臣右正言知制誥者伏以
王者尊居萬民之上而誠意能與下通奄有四海之大
而惠澤得以徧及者得非號令告詔發揮而已哉然其
為言也質而不文則不足以行遠而昭聖謨一作麗而
不典則不足以示後而為世法居是職者古難其人乃
以愚臣而當此選臣某中謝伏惟尊號皇帝陛下茂仁

聖之姿荷祖宗之業日慎一日曾未少懈而自羗夷負
固邊鄙用師勤儉率先於聖躬焦勞常見於玉色雖有

憂民之志而億姓未蘇雖有欲治之心而羣臣未副故
每進一善則未嘗不欲勸天下之能每官一賢則未始
不欲盡人材之用雖以爵祿而砥礪尚須訓誡之丁寧
尤假能言以諭至意可稱是者不又一作大艱歟伏念臣

雖以儒術進身本無辭藝可取徒值嚮者時文之弊偶
能獨守好古之勤志欲去於雕華文反成於樸鄙本懼
不適當世之用敢期自結聖主之知陛下獎之特深用
之太過此臣所以懇讓三四至於辭窮而天意不回寵

命難止尚慮頑然之未諭更加使者以臨門恩出非常
理難屢瀆及俯而受命伏讀訓辭則有必能復古之言
然後益知所責之重夙夜惶惑未知所措伏况文字之職
廁於侍從之班在於周行是為超擢不徒揮翰以為効
自當死節以報恩惟所使之期於盡瘁

龍圖閣直學士河北都轉運使謝上表

開

慶歷四年八月

月

謝獎諭編次三朝故事表

慶歷四年九月

臣修言今月二十八日進奏院遞到詔書一道以臣前奉詔編次三朝故事成上進訖特賜獎諭者聖后當天孝循先志嘉與左右奉為大法成編上聞懼不稱旨蒙詔溫諭以榮以悸臣某

中謝

臣聞藝祖造邦翕受駿命

文綏武服震聳萬方十七年間大業以定神宗享御睿謀獨斷照姦以察用賢以誠政清法明夷夏安樂章聖紹衣上下錯國既安玉帛走於庭犀革橐於庫刑賞有典禮樂有經草木人靈鬯懋歡喜恭惟皇帝陛下以甚

盛之德位久大之業日旰坐朝昧爽思道置器安處納
民大中尚惟一祖二宗之遠謨有百世無疆之丕訓君
臣所以固附天人所以調諧法令所以必行邦國所以
從乂天垂日皎布在方冊爰詔近侍採摭要實秘在大
府用裨聖政盖守成念夫至艱孝者先乎善繼睿心遠
紹振古與偕臣親被上音適終論次慮失煩簡隕越待
罪聖度兼貸錫以褒言誓捐微軀仰荷鴻覆瞻望宸宸
無任激切

謝賜慶歷五年歷日表

伏以聖人在上天地節陰陽和一日十二辰五星二十
八舍皆安次而行四時八風六律二十四氣各應時而
至臣愚幸同萬物俱被長育而得與草木自別使知寒
暑之期臣某中謝伏惟尊號皇帝陛下聰明睿智天縱
多能向因萬幾之餘親考上元之歷以授百職以同萬
方而臣官任轉輸兼司按察若乃加正朔於四海頒政
教於明堂陛下總其要而舉其大端至於經時節勸農

桑候豐凶勤畜積順時令察姦非則臣敢不守其職而行其小者庶無失業以答洪恩

滁州謝上表

慶歷五年十月

臣某言臣伏蒙聖恩授臣依前右正言知制誥知滁州軍州事已於今月二十二日赴上訖者謗讒始作大喧羣口而可驚誣罔終明幸賴聖君之在上列職尚叨於清近為邦仍竊於安閑祇荷恩榮惟知感涕臣某

中謝

伏念臣生而孤苦少則賤貧同母之親惟存一妹喪厥

夫而無託攜孤女以來歸張氏此時生纔七歲臣媿無
著龜前知之識不能逆料其長大所為在人情難棄於
路隅緣臣妹遂養於私室方今公私嫁娶皆行姑舅婚
姻況晟於臣宗已隔再從而張非已出因謂無嫌乃一作

仍未及筭遽令出適然其既嫁五六年後相去數千里
間不幸其人自為醜穢臣之耳目不能接思慮不能知
而言者及臣誠為非意以至究窮於資產固已吹析於
毫毛若以攻臣之人惡臣之甚苟羅織過矣逎深文盖

荷聖明之主張得免羅織之冤枉然臣自蒙睿獎嘗列
諫垣論議多及於貴權指目不勝於怨怒若臣身不黜
則攻者不休苟令讒巧之愈多是速傾危於不保必欲
為臣明辨莫若付於獄官必欲措臣少安莫若置之閑
處使其脫風波而遠去避陷穽之危機雖臣善自為謀
所欲不過如此斯蓋尊號皇帝陛下推天地之賜廓日
月之明知臣幸逢主聖而敢危言憫臣不顧身微而當
衆怨始終愛惜委曲保全臣雖木石之心頑實知君父

之恩厚敢不虔遵明訓上體寬仁永堅不轉之心更勵
匪躬之節

賀章獻明肅章懿二皇后祔廟表

慶歷五年十月

臣修言伏覩十月九日赦書章獻明肅皇后章懿皇后
祔廟禮畢者大孝發於宸衷刑于四海休氣蒸乎美澤
賚及萬方華夏歡呼人一作神祇咸一作感悅臣某中賀恭

惟尊號皇帝陛下自天生德繼聖垂衣率勤儉以在躬
推仁恩而浹物動稽先訓謙弗自專奉二后之慈靈永

懷罔極詢百執之公議所據有經然後肅清廟以載嚴
由閔宮而升祔上儀交舉大慶咸均孝思永奉於烝嘗
懿範有光於典策臣守藩地近一作遠受國恩深欣盛事
之親逢與蒼生而共樂

賀祔廟禮畢進奉銀五百兩狀

右臣伏以廟容祔室一人式奉於孝思方物充庭萬國
率從於奔走前件物堅剛挺質粹美稱珍勉修邦貢之
儀用罄臣忠之節

謝賜慶歷六年歷日表

祇膺寵錫伏積兢榮臣某伏惟尊號皇帝陛下愛人育
物精意奉天日用而百姓不知聖德與四時合序是以
星辰順軌日月清明陰陽和風雨節恭己南面授人以
時屬此歲端大頒玉歷臣職在守土愧無他能謹守詔
條其敢失墜

謝賜慶歷七年歷日表

臣修言本州進奏院遞到詔書一道賜臣慶歷七年歷

日一本者天序方周王正肇建凡爾守邦之吏皆蒙頒
歷之恩匪以為私蓋遵彝典臣某

中謝

伏惟尊號皇帝

陛下乾坤覆載日月照臨不言而四時行有作而萬物
覩而乃考覽氣象精窮天人著為玉歷之文以叶明堂
之政舟車所至正朔咸加雖被謫以窮居亦以時而受
賜臣敢不虔遵聖訓順布民時上副欲治之心少逃曠

官之責

一作
答

慰申王薨表

慶歷七年五月

臣某言臣得進奏院狀報五月二十三日以皇叔申王德文薨皇帝幸後苑舉哀挂服者伏以申王德文位崇王爵地重宗藩遽背明時奄然殂謝伏惟尊號皇帝陛下仁親九族孝治萬方成服發哀恩隆禮備臣忝居侍從遠守詔條不獲躬詣闕庭以伸奠慰臣無任哀感之至

賀鴻慶宮成奉安三聖御容表

慶歷七年七月

臣修言伏覩南京鴻慶宮成奉安三聖御容者一人致

孝式表於奉先三后在天並垂於鴻佑人靈交感華夏
歡呼臣某

中謝

伏惟尊號皇帝陛下以上聖之姿撫重

熙之運親執玉幣禮天地之神祇時奉烝嘗報祖宗之
功德乃眷別京之重載崇原廟之儀衣冠出遊仰稽於
故事郡國當幸俾得以奉祠實隆廣孝之風以著不刊
之典臣猥叨辭職方守郡條瞻盛禮以阻陪效歡聲而
徒切

謝加上騎都尉進封開國伯加食邑三百戶表

慶

七年十

二月

訓辭深厚恩典優隆祗服以還戰兢無錯臣某

中謝

伏

念臣材非世用行與時違過蒙獎擢之私忝居侍從之列坐尸厚祿安處善邦當見帝以親郊莫陪嚴祀洎受釐而均慶亦被寵光進爵賜勲即封加戶併茲榮數及廼無功敢不退自省循益思砥礪上答乾坤之造更堅犬馬之誠

賀平貝州表

慶歷八年閏正月

伏聞閏月一日攻下貝州殺到妖賊王則者盜孽竊興

人

一作神

祇共忿果憑睿算悉殄兇徒臣某

中賀

伏惟尊

號皇帝陛下推仁育物浸澤在人常服

一作克

儉以躬行

惟足兵而在念至於多捐金幣講好戎夷務休戰爭蓋

惜士卒德至深而莫報恩既厚則生驕敢肆妖狂自干

斧鉞驅脅

一作脅驅

士衆閉守城闔既違天而逆人宜不攻

而自破而況聖神運畧將相協忠不遺一人咸即大戮

悖慢者警而肅恪

一作恪肅

昏愚者知有誅夷銷沮姦萌震

揚威令臣幸忝郡寄欣聞德音

揚州謝上表

慶歷八年二月

臣修言準樞密院遞到誥勅一道伏蒙聖恩授臣起居
舍人依前知制誥知揚州軍州事已於今月二十二日
赴任訖者貶所脫身遽叨臨於督府歲成無狀仍叙進
於官聯被渥以優撫心增懼臣某中謝伏念臣材非適
用行輒違時徒知好古之勤自勵匪躬之節誤蒙獎拔
驟玷寵榮小器易盈固已宜於顛覆盡言取禍仍多結

於怨仇仰恃公朝臣雖自信在於物理豈有不危矧利
口之中人譬含沙之射影謂時之衆嫉者易為力謂事
之陰昧者易為誣上

一作幸

繫天聽之聰終辨獄辭之濫

苟此寃之獲雪雖永棄以猶甘而況得善地以長人享
及親之厚祿坐安優逸未久歲時亟就易於方州仍陟
遷於秩序有以見聖君之意未嘗忘言事之臣孤拙獲
全忠善者皆當感勵姦讒不効傾邪者可使息心非惟
愚臣獨以為幸此蓋伏遇尊號皇帝陛下乾坤覆載日

月照臨察人常務於究情行賞必思於有勸致茲恩典
施及懦庸誓堅終始之心少答生成之造

潁州謝上表

皇祐元年三月十三日

臣脩言伏蒙聖恩就差臣知潁州軍州事臣已於三月
十三日赴上訖者規求安閑坐享榮祿雖大君之德曲
示含容而為臣之心豈自遑處臣某中謝伏念臣材能
淺薄性識昏蒙偶自弱齡粗知學古謂忠義可以事國
名節可以榮身自蒙不次之恩亦冀非常之效然而進

未有纖毫之益已不容於怨仇退未知補報之方遽先
罹於哀病神與明而並耗風乘氣以交攻睛瞳雖存白
黑纔辨蓋積憂而自損信處世之多危伏蒙尊號皇帝
陛下造化陶鈞高明覆載閔其孤拙未即棄捐付以善
邦俾從私便所冀療治有驗瞻視復完則及物之仁荷
更生之大賜使身不廢猶後效之可圖

謝轉禮部郎中表

皇祐元年四月

臣某言蒙恩授臣禮部郎中知制誥依舊知潁州者恩

出非常榮逾始望人以臣為寵臣以喜為憂伏念臣自
小無能惟知嗜學常慕古人而篤行不思今世之難行
而自遭遇聖明驟蒙獎拔急於報國遂欲忘軀結怨仇
者皆可畏之人所違忤者悉當權之士既將行已又欲
進身惟二者之難兼雖至愚而必達况臣粗知用捨頗
識廉隅故其自被讒誣迨於降黜當舉朝沸議未嘗以
寸牘而自明及累歲謫居不敢以半辭而自理其後再
經寬赦移鎮要藩曾未逾年遽求小郡盖臣知難當之

衆怒尚未甘心思苟免之善謀惟宜退迹則臣於榮進
豈敢僥求此蓋皇帝陛下日月照臨乾坤覆載不忘舊
物曲軫睿慈謂臣貶職之人悉皆牽復憫臣無名之罪
久未雪除故推叙進之文特示甄收之意然臣近於去
歲早已改官建此便蕃豈宜叨竊欲固讓則有嫌疑之
避欲遽受則懷忝冒之慙進退之間凌兢失措惟當盡
節上報深恩

謝復龍圖閣直學士表

皇祐元年八月

臣修言今月十八日樞密院遞到誥勅各一道伏蒙聖恩授臣依前禮部郎中充龍圖閣直學士仍舊知潁州者恩還舊職事雪前誣感極心驚涕隨言出臣某

中謝

臣伏見前世材賢

一作賢材

之士身結主知勲德之臣功施

王室然尚或一遭謗毀欲辨無由少忤要權其禍不測顧如臣者何足道哉臣材不迨於中人功無益於當世用之未見其效去之無足可思矧固極之讒交興而並進易危之迹何恃而不顛而聖心不忘恩意特至辨罔

欺於曖昧沮仇疾於衆多雖暫居譴謫之中而屢被陞
遷之渥今又特蒙甄錄牽復寵名以臣之愚豈比前人
而獨異推其所幸盖由聖主之親逢謂宜如何可以論
報再念臣稟生孤拙本乏藝能徒因學古之勤粗識事
君之節苟臨危效命尚當不顧以奮身況為善無傷何
憚竭忠而報國誓期盡瘁少答高明

南京謝上表

皇祐二年七月

臣某言伏蒙聖恩就差臣知應天府兼南京留守司事

臣已於今月二十四日赴上訖者守宮鑰之謹嚴敢忘

夙夜布政條之纖悉上副憂勤寄任非堪兢營並集臣

某

中謝

伏念臣賦才庸薄稟數奇屯毀譽交興兩嘗過

實寵榮踰分動輒招尤念報效之未伸敢不竭忠而盡

瘁因風波之可畏則思遠去以深藏造此六年外更三

守學偷安而杜口負素志以媿心朽質易衰已凋零於

齒髮良時難得尚希慕於功名豈謂皇慈未捐舊物擢

從支郡委以名都惟此別京舊當孔道簿領少勤於職

事厨傳取悅於路人苟循俗吏之所為雖能免過非有古人之大節未足報君

謝明堂覃恩轉官加勲表

皇祐二年十月

臣某言今月十三日進奏院遞到誥勅各一道伏蒙聖恩授臣尚書吏部郎中加輕車都尉依前龍圖閣直學士仍舊知應天府兼南京留守司事及放朝謝者天地號令風雷鼓行一氣所均萬物咸被遂容僥倖亦與褒升臣某中謝伏念臣材不逮人識非慮遠徒有事君之

節未知報國之方冒寵貪榮已踰其量見利臨得曾不知慚此者伏遇尊號皇帝陛下堯舜聰明禹湯勤儉修前王之曠典述先志以繼成昭致精裡躬臨路寢膺受上天之多福推與萬方而不私臣於此時限以官守講議制禮不預議郎博士之流助祭陪祠不在諸侯方物之列既乏一言之獻又無執事之勞徒隨翟閭共享餘賜普天率土難異衆以獨辭躋厚跼高但撫躬而無措

文忠集卷九十

欽定四庫全書薈要卷一萬四千三百七十六

集部

文忠集卷九十一

宋 歐陽修 撰

表奏書啓四六集第二

謝賜對衣狀

至和元年六月

右臣伏以粹然玉色方覲於清光賁以身章遽蒙於寵
賜授受之際兢懼交相伏念臣材靡及中器非周用邁
光華之在旦荷榮祿以逾涯非惟罪謗之多罹實亦禍
罰之並至苟存遺體僅續餘生敢謂伏蒙尊號皇帝陛

下覆燾之恩幽微必及召從廬次復以官聯當陞見之
云初陳筭衣而有煥飾躬增耀愈彰不稱之譏處物雖
愚猶識謝生之所臣無任

辭翰林學士奏

至和元年九月

臣今日準閣門告報蒙恩除臣翰林學士所降勅告臣
未敢祇受竊以內制之職選用非輕臣以庸虛繆塵侍
從歲月雖久能效無聞居外任不歷煩難在朝廷未有
補益見居學士之職已甚厚顏豈敢更希榮進況臣屯

蹇之迹憂患所侵齒髮凋殘心志衰耗嚮侍老母久纏
疾恙尋丁憂制僅有餘生累歲以來學業荒廢詔誥之
任尤非所當欲望聖慈察臣衰拙所有恩命特賜寢停
臣無任

謝宣召入翰林狀

使車入里君命在門閭巷驚傳豈識朝廷之故事搢紳
竦歎以為儒者之至榮在臣之愚何以堪此竊以文章
一作之任自古非輕待遇寵榮至有私人之目詢謀獻

納因加內相之名恩既異於常倫人愈難於稱職伏念
臣器非宏遠識匪該明學不通古今之宜材不識方圓
之用久叨塵於侍從曾莫著於勞能而自出守外藩近
遭家禍苟存餘喘復齒周行風波流落者十年天日再
瞻於雙闕進對之際已蕭颯於霜毛慰勞有加賜憫憐
於玉色形神若此志意可知身已分於早衰心敢萌於
希進加以羈危之迹仇嫉交攻進退動繫於羣言論議
多煩於睿聽雖覆載之造每賜保全而孤蹇偷安常思

引去敢謂伏蒙尊號皇帝陛下俯憐舊物曲軫宸慈因
內署之闕員俾備官而承乏臣敢不勉尋舊學益勵前
脩感遺簪未棄之仁竭駑馬已疲之力庶伸薄効少答
鴻恩

謝對衣金帶鞍轡馬狀

同前

右臣伏蒙聖慈以臣入院特賜衣一對金帶一條金鍍
銀鞍轡馬一疋者禁林促召彌峻於近班慈澤逾涯復
叨於蕃錫退循昧陋曷稱暉榮伏念臣素乏藝文久塵

清近神都繁浩常懼於曠官內署凝嚴遽叨於廁職便
蕃曲被兢慄方深豈謂載厚宸慈式垂寵賚兼金錫帶
榮踰廊落之名在笥頒衣媿甚曳婁之刺輟以內閑之
駿飾精寶校之光俯耀微軀仰慚殊渥庸何疇補但誓
縻捐臣無任

乞洪州劄子

嘉祐二年

臣去冬曾有奏陳乞差知洪州一次尋以差入貢院無
由再述懇私伏念臣本以庸愚叨塵恩寵一入禁署迨

今年進無補於朝廷退自迫於衰病眼目昏暗脚膝
行步頗艱右臂疼痛舉動費力雖翰苑事無繁劇聖恩
曲賜優容然非養病尸居之地兼臣鄉里在吉州昨於
丁憂持服時歸葬亡母荒迷之中庶事未備本期服闋
還朝上告聖慈乞一近鄉州郡貴得俸祿因便營緝而
自叨禁職荏苒歲時貪寵忘親此又人子之責也所以
夙夜彷徨不能自止欲望聖慈憫臣衰老察臣懇迫特
許差知洪州一次取進止

辭侍讀學士劄子

嘉祐三年三月

臣準閣門告報伏蒙聖恩授臣兼侍讀學士臣伏見侍讀之職最為清近自祖宗以來尤所慎選居其職者常不過一兩人今經筵之臣一十四人而侍讀十人可謂多矣臣以愚謬忝廁翰林又充史職太常禮儀祕閣祕書省尚書禮部刊修唐書然則在臣不謂無兼職而經筵又不闕人忽沐聖慈特此除授蓋以近年學士相承多兼此職朝廷以為成例不惜推恩比來外人議者皆

云講筵侍從人多無坐處矣每見有除此職者則云學士俸薄朝廷與添請俸官以人輕一至於此欲乞罷臣此命不使聖朝慎選之清職遂同例授之冗員况臣材識淺薄自少以來粗習辭章過蒙進擢俾塵禁署中年衰病常憂廢職至於講說經義博聞強記矧復非臣所長今耆舊之臣經術之士並侍講讀者足以備顧問承清光欲望聖慈矜臣不材自知俾免冒榮之誚所有告勅不敢祇受取進止

再辭侍讀學士狀

嘉祐三年三月

右臣準中書劄子以臣辭免侍讀學士恩命奉聖旨不許辭讓者伏念臣猥以庸虛過蒙獎擢禁署為一時清選既已忝竊經筵况近例多兼何必辭讓蓋以臣身見兼八職侍讀已有十人為朝廷惜清職遂為冗員况講席不添人未至闕事所以敢陳瞽說乞免冒榮臣伏見國家近年以來恩濫官冗議者但知冗官之弊不思致弊之因蓋由凡所推恩便為成例在上者稍欲裁減則

恐人心之不足在下者既皆習慣因謂所得為當然積少成多有加無損遂至不勝其弊莫知所以裁之中外之臣無有賢愚共知患此而臣為陛下學士職號論思豈有目覩時弊心知可患無所獻納而又自身蹈之今既已陳述若又不自踐言則貪榮冒寵不止尋常之責而虛辭飾讓又為矯偽之人此臣所以恐迫惶惑不自知止也伏望聖慈矜臣至懇察臣狂言許寢新恩俾安常分謹具狀奏聞伏候勅旨

辭開封府劄子

嘉祐三年六月

臣伏聞內出誥勅各一道付閣門除臣兼龍圖閣學士
權知開封府臣以庸拙久塵侍從初無勞效以伸補報
日夕循省常愧心顏今者曲蒙聖慈悞加選用豈可苟
避繁劇輒希辭免蓋臣有不得已者須至縷陳臣自前
歲已來累有奏列

一作狀

乞一外任差遣蓋以臣久患目

疾年齒漸衰昏暗愈甚又自今年春末忽得風眩昨於
韓絳入學士院勅設日衆坐之中遽然昏踣自後徃徃

發動緣臣所修唐書已見次第所以盤桓欲俟書成便
乞補外豈期聖造委以治煩臣素以文辭專學治民臨
政既非所長加以早衰多病精力不彊竊慮墮官敗事
上誤聖知兼所修唐書不過三五月可以畢手置局多
年官吏拘留糜耗供給今已垂成若別差人轉成稽滯
只委臣了畢則恐無暇及之欲望聖慈矜臣衰病才非
所長欲乞別選材能許臣且仍舊職候唐書成日乞一
外任差遣以養衰殘今取進止

乞洪州第二劄子

嘉祐四年正月

臣輒有愚懇上干聖聰出於至誠不敢緣飾臣本以愚懦別無材能過蒙恩私列在侍從初無補報之效每以尸素為慚昨者忽被選差俾權京尹臣雖知材力淺薄衰病侵陵當此浩穰實難辦濟直以忝廁翰苑迄今數年所職清閒過享優逸一旦遽蒙煩使不可再辭亦欲勉強年歲之間少陳筋力之效苟無曠貶乞一外州不意眼目舊疾遽然發動蓋自供職以來旦旦常於燈燭

下者讀文字及簽書發遣自早至夜率以為常全藉眼力而臣舊患已及十年兩目眊然中外具見近一兩月來暗昏疼痛屢在假告不無廢事人雖未責臣豈自安臣自前累曾陳乞江西差遣一任欲乞檢會臣前後陳乞依蔡襄例除臣洪州一次俾解繁劇以養衰殘伏望聖慈特賜矜允今取進止

乞洪州第三狀

右臣近罄懇私自陳衰病願罷權尹乞一外州伏蒙聖

恩降詔不允臣以庸繆過叨獎擢不能陳力輒欲辭勞

當被刑誅敢期詔諭理宜祇惕明訓勉勵疲駑而敢再

干天聰固自愚執者蓋臣有不得已也臣舊患兩目於

今十年近日以來發作

一作動

尤甚眇淚浸溢睛瞳眊昏

視物稍多其痛如割欲頻請假告則浩穰之地豈自遑

安欲竭力枝梧則疾患內攻有難勉強夙夜憂畏不知

所為欲望聖慈憫臣衰殘察臣愚拙許解繁劇假一遠

外之州俾之待罪臣無任瞻天祈恩激切之至謹具狀

陳乞伏候勅旨

乞洪州第四劄子

臣近兩曾陳乞差知洪州一任未蒙恩許蓋以臣衰病不支難當任使素心所切苟欲便私非敢自圖外州以就優逸臣年雖五十三歲鬚鬚皓然兩目昏暗自丁憂服闋便患脚膝近又風氣攻注左臂疼痛舉動艱難一身四肢不病者有幾以此貪冒榮祿無處劇繁實知難濟矧自權行府事以來三致臺諫上言兩煩朝廷起獄

其他碌碌常事亦無分寸可稱蓋其資材本自庸虛加以精神日漸耗竭處之清職則論議謀猷無一可取擢以煩使又心力疲憊自訴不能上賴聖慈憐憫雖未遽棄於外而臣自處實所難安伏見侍從之班交相出入昨呂溱劉敞並請補外不三數歲今悉召歸況如臣者留之無所補去之無所惜者哉欲望聖慈矜臣此志乞一外任差遣得以養理衰殘誓於餘年少圖報效今取進止

辭轉給事中劄子

嘉祐四年二月

臣近曾陳乞外任差遣伏蒙聖慈許臣解罷府事兼授
臣給事中臣本以庸虛誤蒙獎任不能陳力況未及朞
遽以衰病自求罷去理當黜責以勵不才豈宜非時濫
被恩賞況臣權府之初已蒙加以兼職到今才及半年
有餘不因朝廷別有差使只是自以疾病求罷豈可又
轉一官雖聖恩優厚過寵衰殘而臣自揣量無容濫受
所有恩命乞賜停寢只許令臣歸院供職所貴少安疲

病今取進止

再辭轉給事中劄子

同前

臣近準閣門告報蒙恩授臣給事中臣等曾瀝懇乞賜
寢停今準中書劄子奉聖旨不許辭讓便令授告勅者
臣本庸材蒙陛下擢在翰苑言語侍從既無所納以伸
報效任以煩使又自陳疲病訴以不能然則如臣久冒
寵榮果堪何用上賴聖君優容未加黜責豈可授命之
日已蒙加職不久罷去又復轉官此臣所以慙懼徊徨

不敢即受也臣竊見前知府呂公弼差知益州授樞密直學士及公弼辭免不行徙領郡牧遂却只依舊充龍圖閣直學士王素蔡襄並因方面之寄乃遷職是則罷府供職京師者不當別有遷轉此近例也臣非敢飾僞上煩聖聰直以恩寵頻併理當辭避欲望聖慈察臣無所堪用矜臣能自揣量俾寢新恩免貽羣議今取進止

舉呂公著自代狀

同前

臣伏見司封員外郎崇文院檢討呂公著出自相門躬

履儒行學贍文富器深識遠而靜默寡欲有古君子之風用之朝廷可抑浮俗置在左右必為名臣非惟臣所不如實當今難得之士臣今舉以自代

進新修唐書表

嘉祐五年七月戊戌為
提舉編修魯公亮作

臣公亮言竊惟唐有天下幾三百年其君臣行事之始終所以治亂興衰之迹與其典章制度之英宜其粲然著在簡冊而紀次無法詳略失中文采不明事實零落蓋百有五十年然後得以發揮幽昧補緝闕亡黜正偽

謬克備一家之史以為萬代之傳成之至難理若有待

臣某

中謝

伏惟尊號皇帝陛下有虞舜之智而好問躬

大禹之聖而克勤天下平和民物安樂而猶垂心積精
以求治要日與鴻生舊學講論六經考覽前古以謂商
周以來為國長久惟漢與唐不幸接乎五代衰世之士
氣力卑弱言淺意陋不足以起其文而使明君賢臣雋
功偉烈與夫昏虐賊亂禍根罪首皆不足暴其善惡以
動人耳目誠不可以垂勸戒示久遠甚可歎也乃因邇

臣之有言適契上心之所関於是刊修官翰林學士臣歐陽脩端明殿學士臣宋祁與編脩官知制誥臣范鎮臣王疇集賢校理臣宋敏求祕書丞臣呂夏卿著作佐郎臣劉義叟等並膺儒學之選悉發祕府之藏俾之討論共加刑定凡十有七年成二百二十五卷其事則增於前其文則省於舊至於名篇著目有草有因立傳紀實或增或損義類凡例皆有據依纖悉網條具載別錄臣公亮典司事領徒費日月誠不足以成大典稱明詔

無任慙懼戰汗屏營之至

辭轉禮部侍郎劄子

嘉祐五年七月庚子

臣準閣門告報蒙恩除臣禮部侍郎令臣授告勅者臣伏思聖恩所及必以臣近進唐書了畢凡與脩書官並均睿澤竊緣臣與他脩書官不同檢會宋祁范鎮到局各及一十七年王疇一十五年宋敏求呂夏卿劉義叟並各十年已上內列傳一百五十卷並是宋祁一面刊脩一部書中三分居二范鎮王疇呂夏卿劉義叟並從

初置局便編纂故事分成卷草用功最多如臣者蓋自
置局已十年後書欲有成始差入局接續殘零刊撰紀
志六十卷是臣到局月日不多用功最少今來一例受
賞臣實愧心兼臣自嘉祐二年蒙恩轉諫議大夫三年
蒙恩加龍圖閣學士四年蒙恩轉給事中到今方及一
年豈可又一作加以無功濫賞臣不敢虛飾辭讓煩黷朝
廷理有不安實難自默欲望聖慈特寢新命令取進止

再辭轉禮部侍郎狀

右臣今月二十二日奉被詔書一道以臣乞寢新除禮部侍郎恩命不允事伏念臣出自孤寒累蒙獎擢職忝學士官至給事中前後所授恩命不少豈敢頓於此際過飾偽辭取好讓之虛名為有識之所誚實以臣撫心內愧不敢自欺蓋以唐書置局已十餘年纂錄垂就臣最後至接續分撰卷數不多用功最少不敢與從初置局及在局年深用功勤勞人一例受賞所陳情實皆有據依不敢過言冀為可信敢謂特煩詔諭前例所無上

體聖恩便合祇受而臣迫於懇悃實所難安夙夜徊徨
莫知所措若以臣雖無功效不欲獨遺欲望聖慈稍加
裁損或於階勲食邑一有所需俾臣得不過分足以為
榮臣若自欺不言則冒寵雖多為愧愈甚臣不勝激切
戰懼屏營之至謹具狀陳乞以聞伏候勅旨

賀壽星表

至和三年二月誤雕在此

臣某等言天雖不言事以象見保佑聖德其祉無疆臣
某等中賀伏惟尊號皇帝陛下以憂勞勤儉之志躬自

發憤而以仁慈寬厚之惠愛養元元下洎萬邦小大諸
物咸欲各正性命而畢安其生上天降監宜有以報庚
寅之夕星見南方占考天文福在人主惟天去人不遠
如此災祥在德可不戒哉臣等忝備詞臣無所裨補惟
願清心屏欲以隆南山之固而享一有無疆之休夫字

乞洪州第五劄子

嘉祐五年七月

臣猥以庸虛過蒙獎擢久列侍從訖無補報年齒老大
疾病侵陵聽重目昏聰明並耗髮白手顫精力俱衰兼

以父母墳塋遠在江外未有得力子弟照管誠心迫切
臣自三四年來累曾陳乞一外任差遣中間緣奉勅刊
修唐書未見次第所以盤桓歲月不敢再三堅請今來
唐書已得了當欲望聖慈差臣知洪州一次所冀退養
衰一作踈拙兼便私塋取進止

乞洪州第六狀

嘉祐五年 缺月

右臣近瀝懇私上千睿聽以臣年衰多病父母墳墓在
遠無人照管乞一次江西差遣至今未蒙恩旨臣以病

攻於外

一作內

事迫於中

一作外

既不自安實難緘默將期

得請不避煩言重念臣不幸少孤先父遠葬鄉里在吉

州之吉水昨臣丁母憂日又扶護歸葬然臣方在憂禍

故事力有所不周臣但仰天長號撫心自誓祇期服闋

便乞一江西差遣庶幾近便營緝至於種植松栢置田

招客蓋造屋宇刻立碑碣之類事難倉猝冀於一二年

間勉力可就當是時鄉人父老親族故舊環列墓次並

聞臣言自臣除服還朝皆引領望臣歸踐前約而臣遷

延祐再一任七年是臣欺罔幽明貪戀

一作其

榮祿食言

不信罪莫大焉兼臣稟賦奇薄衰羸多病兩目昏暗已

踰十年近又兩耳重聽如物閉塞前患左臂疼痛舉動

無力今年以來又患右手指節拘攣至於鬚鬢蕭颯

一作

條

久已皤然臣自視形容如此不惟不宜濫廁賢材英

雋之士出入朝廷以取笑於搢紳之列實慮早衰易殞

恐遂不得一償素志以為終身之恨臣自數年以來雖

累曾陳乞而懇誠不至天聽未回亦嚮欲伺候唐書了

畢今者幸已成書上奏其餘所領並是尋常職務別無
朝廷差委勾當未了事件臣是敢罄述愚衷備盡微瑣
伏念臣本乏材能初無階援特蒙睿獎拔自常流置在
侍從殆今十有七年矣訖無補報孤負恩榮伏望聖慈
察臣心志凋零形骸朽悴閔臣昔當少壯銳意立朝今
而衰退一至於此哀臣情實迫切乞賜檢會數年以來
前後陳乞特許與除知洪州一次臣雖疲憊猶能遵奉
詔條修舉常職誓殫犬馬之力上酬天地之仁臣無任

卷九十一
徊徨激切謹具狀奏聞伏候勅旨

乞洪州第七狀

同前

右臣奉被今月二十一日詔書一道以臣陳乞江西差遣宜不允者伏念臣早以孤賤誤玷恩榮而生稟拙艱動罹謗咎往自河北斥守滁陽在外十年遂至白首頃除憂制還奉內朝幸蒙聖恩收以桑榆置之翰苑凡今仕宦光寵孰不樂在朝廷職任清優顧亦無出禁近臣豈不思嚮之流落引領欲一作願還而乃却蹈風波自投

遠外此之愚計豈近人情蓋以臣事迫心危有不得已
凡諸懇悃嘗具剖陳不敢煩言况已罄盡再念臣遭遇
明聖過被恩私犬馬無知猶能報効而臣性既踈簡識
非明敏少以專學而自愚不能趨世以濟務效當求實
而安事虛名才貴適時而一無可用至於上所詢訪時
有論議亦碌碌隨衆人未嘗有所建言縱令有之亦不
足采惟有文字繆為流俗過稱而自供職禁庭殆今七
載屬中外無事文書甚簡不過月赴四五直飽食甘寢

止撰青詞齋文一兩通只此為臣所能是臣事業去之
亦何闕於事存之又奚補於時將何以上煩睿慈曲示
恩意特頒詔諭前例所無捧讀驚慚繼以感涕臣亦竊
聞近日兩制臣寮多求外任彼皆材業有素年齒方彊
又無事於外方可以且留供職惟臣材無可用年又漸
衰外有私營冀償夙素欲望聖慈畀之一郡使其志畢
願從若天幸餘齡未填溝壑則遺簪舊物尚或冀於見
收而疲馬君軒豈不知於有戀臣無任祈恩激切之至

謹具狀陳乞以聞伏候勅旨

辭侍讀學士狀

嘉祐五年九月

右臣準閣門告報蒙恩除臣兼侍讀學士者竊以學士不宜兼侍讀臣於前歲已具陳論當時蒙恩遂許辭免在於今日豈宜復授得非以方今經筵闕人而臣在學士中適當次補聖恩優異不忍獨遺臣以衰殘久塵禁署已兼龍圖閣學士而在院學士多未有兼職况臣前已有言理宜自踐欲乞許臣只兼舊職其經筵闕侍讀

別賜除人所有誥勅臣不敢祇受今取進止

辭樞密副使表

嘉祐五年十一月

臣某言伏奉制命蒙恩特授臣依前禮部侍郎充樞密副使仍加食邑實封散官勲賜如故者成命始行驟驚於衆聽撫心增懼曾莫以自容臣某中謝竊以樞要之

司朝廷慎選出納惟允實贊於萬機禮遇均隆號稱於

二府顧任人之得失常繫國

一作體

之重輕苟非其材所

損不一伏念臣器能甚薄風力不强少喜文辭殆浮華

而少實晚勤古學終迂濶以自愚而自遭逢盛明擢在侍從間嘗論天下之事言出而衆怨已歸思欲報人主之知智短而萬分無補徒厝危躬於禍咎每煩聖造之保全既不適於時宜惟可置之閑處故自叨還禁署逮此七年屢乞方州幾於十請瀝愚誠而懇至被明詔之丁寧雖大度并包猥荷優容之賜而羣賢在列敢懷希進之心豈謂伏遇尊號皇帝陛下急於求人思以濟治因柄臣之並選憐舊物以不遺然而致遠之難力不勝

者必速其覆量材不可能自知者猶得為明敢冀睿慈
察其迫切俾回渙渥更選雋良如此則器不假人各適
賢愚之分物皆知報何勝犬馬之心

謝樞密副使表

臣某言伏奉制命蒙恩特授臣依前官充樞密副使尋
具表陳免蒙降批答不允斷來章者右樞虛府充位宜
求於雋賢多士盈庭誤選乃先於庸妄既牢辭之靡獲
徒冒寵而為憂臣某

中謝

伏念臣少本賤愚初無志慮

為小人之事力不勝於負薪程有司之文學止期於干
祿過被仁恩之樂育早從英俊之並遊遂叨侍從之流
久玷論思之地方時求治殆無補於毫分一作分毫顧質早
衰況漸凋於齒髮但思藏縮敢望甄陞矧惟贊萬事之
機必也極一時之選豈容濫得猥以備員當命令之始
行方惶惑以自失而睿恩至渥召旨甚嚴莫諧懇避之
誠徒負貪榮之媿此蓋伏遇尊號皇帝陛下廓天地之
量垂日月之光憐樸直之無他謂疲鵠之可勉俾承闕

之以効拙勤臣敢不奮勵無能之姿感激難逢之會職思其位庶免於曠官謀不以身少期於報國

辭參知政事表

嘉祐六年八月

職參論道宜極選於一時授匪其人實駭聞於衆聽恩榮所被跼蹐難安臣某

中謝

伏念臣本乏材能徒緣幸

會列於侍從白首無聞置在樞機素餐已甚雖聖主之恩天地曲示含容而朝廷之事毫釐動關利害豈止曠官之誚每懷誤國之憂矧惟政事之臣實代天工之任

俾之贊貳宜擇材賢伏望尊號皇帝陛下收誤獎之恩
廣僉諧之訪憫疲駕之已試備見無庸求俊又於在廷
擢之不次俾獲安於舊職冀免速於罪辜報効之誠殞
糜後已

謝參知政事表

贊貳國鈞參聞廟論謂宜不次而選冀得非常之材廼
以敘遷俾之承乏誤恩過被訴讓靡從臣某

中謝

伏念

臣少迫賤貧偶勤學問儒者博而寡要况匪多聞文章

世之空言豈能適用徒以早邁亨嘉之會驟蒙獎拔

一作

擢之私叨言語侍從之流逮今踰紀玷出納樞機之任
初乏可稱幸先殫理之未加每欲逡巡而引去敢期睿
眷俾與政機優以寵章進其爵秩望非意及榮與憂并
此蓋伏遇尊號皇帝陛下堯德聰明禹躬勤儉博求俊
乂以濟治康謂臣既朴且愚必能循於忠謹雖愚而懦
尚可策其疲駑猥以備員遂茲冒寵臣敢不益堅素守
自勉不强惟殫犬馬之勞上答乾坤之造

辭明堂加恩表

嘉祐七年九月

祭之為惠雖澤貴乎均而賞不因功則士無以勸既難
安於兢愧敢自避於黷煩臣某

中謝

伏念臣性本顓愚

學無師法才不適當世之用識不通治古之原誤蒙聖
知擢自平進俾參國論幸有蘊而得施坐耗歲時訖無
稱而取誚方懼素餐之責敢懷濫得之心屬宗祀之有
嚴奉精禋之致孝陪二大臣之後既竊窺於盛儀獻千
萬歲壽之觴獲共慶於成禮然而賜之胙餼蒙福已多

加以寵榮在臣豈稱伏望尊號皇帝陛下回高明之聽
察懇至之誠推一人有慶之恩賜先於幽遠憫小器易
盈之量俾免於覆顛特收渙汗之行仰冀曲全之造

謝賜飛白并賜宴詩狀

嘉祐八年正月

右臣去月二十七日伏蒙聖慈召赴天章閣觀太宗真
宗御集次赴寶文閣觀御飛白書賜以金花牋字遂賜
宴於羣玉殿臣本出寒儒遭逢盛旦誤被獎擢參贊鈞
衡陛下憂勤萬幾德被四海邊鄙不聳年穀順成民物

熙閑聖心怡豫臣於此際既得以尸素偷安而又獲親
侍清光便蕃恩錫一時之盛事千載之難遇臣不勝至
榮至幸謹課成召赴天章閣寶文閣觀祖宗御集賜飛
白羣玉殿賜宴五言八韻詩一首隨狀上進干瀆宸嚴
無任惶恐戰汗屏營之至

謝覃恩轉戶部侍郎表

嘉祐八年英宗
登極四月上

皇明繼照如日之昇睿澤霽流溥天咸被時惟朽懦亦
玷光華臣某

中謝

伏念臣本以庸虛僅知學問識不周

於徃行

一作時用

材莫建於中人方其壯年喜論時事名聲

濫得招謗咎以偕來榮寵踰涯蹈憂危而亦至晚被先

朝之誤獎俾陪二府之後塵居無補於休明方自期於

引避遽號弓而結恨雖殞體以何追伏遇皇帝陛下奮

發乾剛嗣承天統當茂業繼文之始乃歡謳歸啟之初

宗社獲安人神洽

一作合

慶矧惟新之號令方無間於幽

遐顧於茲時其敢獨異俯從祇受但益凌兢敢不勉勵

衰殘感遇今昔更竭疲篤之效庶伸塵露之微

謝皇太后表

嗣聖當天法重離而正位鴻恩浹物均萬國以同休遂
容尸素之臣猥被優隆之渥臣某


中謝

伏念臣名雖學

古性實迂儒徒誦習於典墳靡該通於今古爰從束髮
遭會明時蒙先帝之誤知與羣英而並進紫樞黃閣叨
陪論道之司白首丹心徒有報君之志屬綴衣之揚命
奉主鬯以承祧方推慶賜之行遽荷便蕃之寵伏遇皇
太后殿下坤元厚載母道居尊惟茲聽覽之初務霽汪

洋之澤臣敢不勉修職業上副憂勤送往事居忘身盡
節庶展涓埃之效少酬覆燠之私

文忠集卷九十一



總校官庶吉士臣張能照

校對官中書臣孫希旦

膳錄監生臣張起隆

膳錄監生臣費恩綸